

2 NWER NYI POL NYONO TV TIMOTI

¹ Me Pol ji li ntiingetib a Kraist Jisos, me ji koro Esowo, á yehk-m tum tib go enyam bi elkpin ni á nyame no, ni li go abo nya Kraist Jisos,

² n kp'nyono nwer nyia tv Timoti mmon ewame no kpo kor-m s'sehng.

Nong Esowo Nsoo, a Kraist Jisos Ntul ewahre ka-a nnoobo, a elkoono, wo fere fil-e ndon.

Ana Pol kake Timoti eltim

³ Timoti, n l'buum-a go egame ero bi n kpo kak atv a njul, n kpo kak Esowo saam, ye ji n kpo lok-e atahng emame saang ana babnsoo jo lim.*

⁴ N kp'buumu ana a jolo ndon ndon, a abonngo go amahr. Owo wahnge n kp'sahb s'seb re me n tiki ba nyehn-a, eji eyebatahng l'sahb gbal-m gbal go egame atahng.

⁵ Me m buumu etingitingi ekakesehk ji a kpi no, elkohn ekakesehk j'nehm o ji nne no nkul bele no, no bo jo lung-e re Lois, j'nehm o ji nne Yunis tob bel.† N kp'kahne re, elkohn n'nehm ni a kpi no.

⁶ Ano wo wahnge n kp-a kpeke buumu re, wo ko ayare nya Esowo ka-a no, nya wob-a go ega atahng, jo lim eltum, k'bum na bum, ayare nya a bele no eji n kun-a ebo ebame.‡

* **1:3 1:3** Elt 23:1; 24:16 † **1:5 1:5** Elt 16:1 ‡ **1:6 1:6** 1 Tim 4:14

⁷ Tibre Esowo wahr kaam etohko jio ji elfahle. Á ka-r etohko ji nsahm, ji li etohko ji elkoro, ji kpo lim-r, e fere jo mal bob elnahre.§

⁸ Owo wahnge nobo re wo k'jo be ndon nyi ntianse ayiimi ka Ntul ewahre.* Ka ma jo nyaare, tib eji n wob ngbekobo go ege esi. Ga nob re wo tob taame erem tib esi jio ji nnoobo etib, ana Esowo ma-a ka eko,

⁹ Esowo bio bi ma-r tahre, fere lung-r re, wahr jol ane babe. Lohngem re eltum ni e ma lim ni wahnge á lung-r no. Á lung-r tib go ege esi, a esi ji nnoobo enye nyi á ka-r no, nyi sehng go abo nya Kraist Jisos, njini kehm jolo.

¹⁰ Anv, wahr ebnyehn nnoobo nyi Esowo, eji Kraist Jisos nt'tahre ewahre ma ba, ye jio ji ma tane nsahm nyi elkv.† Yeblennge elkpín ni li go njinanjini eji á ma-r tiingi nnoobo etib.

¹¹ Esowo ma-m yehke re me n tiingi nnoobo etib bio, fere jo bung alum enye, fere tob jo tib ane.‡

¹² Esi jio ji wahng ka, n kp'nyehne erem bia. N nehme be ndon go nsol nyio. Tibre n kp'kahne nne no m ma taame tv-e. N kp'sahb k'kahn re, á bahke ma kuuru ejum jio ji á ma-m kak go ebo tete rehng go efung bio.

¹³ Jo toono atingitingi alum nya m ma-a tib, wo sa a eltaame n'nehm o, a elkoro ni li go abo nya Kraist Jisos.

¹⁴ Jo kuuru anoobo nsol nya bo ma-a kak go ebo go nsahm nyio nyi Etingi Etohko ji wob-r go egahre atahng.

§ 1:7 1:7 Rom 8:15 * 1:8 1:8 Rom 1:16 † 1:10 1:10 1 Kor 15:55
‡ 1:11 1:11 Elt 9:15

¹⁵ A kp'kahne re, ane bao kpee ba lene go Esia ma-m sennge njahm kpee. Figelus abola Hermogenes tob wob go bo ellong.

¹⁶ Nong, Jehova tib ndon enye go etahk Onesiforus. M-e á nyaarem. Á jo ba nkpel a nkpele, ba kak-m eltim, jol eji n wobo wob ngbekobo.

¹⁷ Eji á ba rehng ga Rom, á seb-m tete, kehm-m nyehne.

¹⁸ Nong, á lub fili Esowo ndon efung bio. A kp'sahb k'kahn nob nob ana á jo loko eltum go Efesus.

2

Nnooba nne a nsoja no Jisos Kraist

¹ Mmon ewame, yiimi t'tahne go nnoobo nyi li go abo nya Kraist Jisos.

² Ko alum enyame nya a ma wuk go esamahr atianse gbalee, wo song tib atingitingi ane ba bahke tob mal tib ane bako.

³ Tob taame, nyehn erem ana nnooba nne a nsoja no Kraist Jisos.

⁴ Nne a nsoja awohng awohng limm, no l'kehme ebta nok, no bahke fere song kehme eljini nehka nehka lim, eji á kp'sebe re á lim ji kp'koro ntubesi ewe no ko-e go eltum.

⁵ Mbekabahl no kpo be abahl, á nehm bel eltuuru ene, sehngem re no, á be jang jang ana eljini abahl li no.

⁶ Mbahmgbe no kpo kak eko, jo lim eltum go ege egbe, ye wo fuumu re á gbo mbang li nsol alehke nyi lohng go ege egbe.

⁷ Jo tir bade alum nya n kp'bungu a, tibre Jehova bahk-a limi re, wo kahn ejum ajehng ajehng.

⁸ Jo buumu Jisos Kraist ji nyahme go elkv, ye ji lohng go et'tohngo ji Devid, ana n kpo tiingi nnoobo etib ebame.*

⁹ Nnoobo etib bi n kpo tiingi bi wahnge n kp'nyehne erem bia, a agbekobo go abo ana ebi nne. Alum Esowo, agbekobo wobem.†

¹⁰ Esi ji ane ba Esowo ma yehke ji wahnge n kp'kpuumu ejum ajehng ajehng, eji bo l'tob bel eltahre ni li go abo nya Kraist Jisos, ni kpo jen a ellub ni li go njinanjini.

¹¹ A wo li atingitingi alum nya bungu re, "L'jol re wahr ebtob kpo a ne, e bahke tob jol a ne go elkpín.‡

¹² E l'jo kpuumu, e bahke tob tob-e edi afili.

E l'ten-e, á bahke tob ten-r fvfo.§

¹³ Jol afi e gbo na go ege a mbang, ekakesehk ji Esowo jia, kpeke li nseenga nseenge, tibre Esowo nehm tiki yaange."*

Nlimeltum no nno

¹⁴ Buumu bo nsol nyia, wo fere tong bo go esamahr Esowo re, bo k'kpe lim nfaabe atemtem. Nfaabe kpehme kak nne ebo, kpo ranngé na ane ba l'wuk.

¹⁵ Jo nok, eji a l'jol nlimeltum no nno go esamahr bi Esowo, ana nlimeltum no kil jo be ndon, eji á kpi eltum Esowo lim. Jol nne no

* 2:8 2:8 Ell 5:5 † 2:9 2:9 Fil 1:12-14 ‡ 2:11 2:11 Fil 3:10-11

§ 2:12 2:12 Mat 10:33 * 2:13 2:13 Rom 3:3

kpo tooro atingitingi alum nya Esowo go nseenga nseenge.†

¹⁶ Ka jo yel go ellong ane ba kpo lim egboolo nfaabe nyi ki li nyi Esowo, tibre nsol nyio nyi kpo wahng ane gbal go abiafem.

¹⁷ Tibre alum ane bao li ana eyam abili, bi l'kehme nne yam ejang ngubjing behka, kpo tob ta yel ejang ngubjing behko. Himeneus abola Filetus, bo wob ellong ane bao fvfo.‡

¹⁸ Bo nehme kpe sehng go mbang nyi li etingitingi mbang. Bobyaange mbang nyindiki kp'toono, fere bvrvv ane bandiki ntim, eji bo kp'tibi re elnyahme ngubjing go elkv ebsehng.§

¹⁹ Nnene limm, no bahke ma yuudu nnahb ekahme nyi Esowo ma bum. Alum nyaa na abal nya, bo nyono go nnahb ekahme nyio. Nehko bungu re, "Esowo kp'kahne ane bao ba li babe."* Nehko bungu re, "Nong, nne awohng awohng no kp'lungu mbing nyi Kraist, á yake ab'bi alimi."

²⁰ Go egburu etahk, ajoobo nsol nyaa gbalee, ana nkpingi, nyimongo bo limi go agul, nyimongo bo limi go asilva, nsol nyimongo bo ko nti lim, nsol nyimongo bo ko ndi lim, nsol nyimongo nyi nno nyi, nsol nyimongo kp'sabe.†

²¹ Nne awohng awohng no l'bum elne saang, yake nsol nyi kp'sabe, á bahke jolo ana ekpingi ji nno, ji bo ma bum eje eje, eji nde nne l'jo ko, lim ejum ajehng ajehng ji nno.

† **2:15 2:15** Tait 2:7-8; Mat 13:52; Luk 12:42 ‡ **2:17 2:17** 1 Tim 1:20 § **2:18 2:18** 2 Tes 2:2-3 * **2:19 2:19** Jon 10:14 † **2:20 2:20** Mat 13:24-33

²² Jo jahng nsol nyi kpo melle ajangkun go bo atahng re bo jo lim. Nok, eji a l'li eno go esamahr Esowo, fere bel ekakesehk, a elkoro, go elkoono, wo fere woomo go ellong ane ba kpo kak ero ka Esowo a ntim ebo saang.

²³ Ka jo yel ellong agboolo ane ba kil kahne ejumjum, ba kpo lim nfaabe nfaabe. Tibre a kp'kahne re, go es'kohlo nfaabe nyio, ntaange nyi kpo gbo.

²⁴ Fuumem re nlokeltum no Jehova jo taange ntaange. Á bahke bele nnoobo eljini a nne awohng awohng, fere jol nne no kpo mal eltibi.‡ Á bahke jo kpuumu, bo l'lim-e ebi,

²⁵ fere jo tub ane ba kp'limi nfaabe a ne elle go enange bem. Fundiki Esowo bahke limi mbang ka bo, bo gbo ndon go bo abiafem, fere kahn etingitingi,

²⁶ eji bo l'lohng go ekpoko bi nnehm nyi ma bob bo re bo jo lim ji kp-e koro.

3

Es'kohro afung

¹ Jo kahne re, ngare es'kohro afung bahke jolo etahntahn ngare.*

² Ane bahke jo tiiri elbo elbo, fere jo baare amahr akpohko, jo wor anyo, fere jo lim agabbe, jo su ane. Bo nehm jo wuk babnde ebo, saam bo nehm jo kak. Esowo nehm jo lub bo.

³ Elkoro anehng anehng bo nehm bel. Bo nehm jo tahm ka ane. Bo bahke jo kiimi afahnge lake

‡ 2:24 2:24 Kol 4:6 * 3:1 3:1 1 Tim 4:1

ane. Ndon bo nehm bel. Bo bahke jo lim nsol, bo nehm jo feere njahm. Elyebe ni njini bahke jo kor bo. Esowo nehm jo kor bo.

⁴ Bo bahke jo bel atem go nnyo a nnyo. Bo bahke jo lim nsol go elrang elrang. Bo bahke jolo ane ba bahke jo rod elbo wahre wahre. Bo bahke jo lim ana ji kp'koro bofono antahng. Esowo nehm jo kor bo.

⁵ Eljini ni bo, bahke jo foongo ni aneb Esowo, jol nsahm nyi bo, bo nehm bel.[†] Ka jo yel ellong ane bao!

⁶ Egom ane bao bandiki bahke jo kpaale yan-nge go etahk ajehng ajehng, song kpiri agboolo anebkal ba ma gbal go ab'bi, bao ba ajoobo nsol kpo melle bo go bo atahng, eji bo l'ko bo elfono.

⁷ Bo kpo kpili na kpili kpili kpili, jol bo nehm tiki kahn etingitingi.

⁸ Ana Jannes abola Jambres jo ten Moses, ano wo fvfo ane bao ba kil elkpe ga tir nob nob kpo tob ten etingitingi. Bobgbo go mbang nyi Esowo.

⁹ Ekidi nehm ga lab, nne awohng awohng bahke nyehne agboolo nsol nya bo kpo lim, jang jang ana ane nyehne goji Jannes a Jambres.

Eljini ni nne Esowo bahke jo lim, kehm jo gbal

¹⁰ Wo Timoti, wobwuk eltibi ename, fere nyehn eljini ename. A kp'kahne ji wahnge n kpi elkpin ana nia. A ny'nyehn ekakesehk ejame, fere nyehn ana n jolo soom. A ny'nyehn elkoro ename, fere nyehn ana n jo kpuumu.

¹¹ A ny'nyehn ana bo jo gbak-m, fere nyehn ana n jo nyehn erem go Antiok, a Ikonium, go

[†] 3:5 3:5 Mat 7:15,21

Listra, fere nyehn ana n kpuumu elgbake nio kpee. Jehova ma-m tahre yehke go nsol nyio kpee.‡

¹² Nne awohng awohng no l'tong re á bahke toono Kraist Jisos, fere jo lim eljini ni Esowo, á bahke tiki jo nyehn erem bi ane bahke jo gbak-e.§

¹³ Abi ane, a ane ba kpo nehm ane, bo kp'soro asi go ab'bi alimi sehng ana wuku wuku. Bo kpo nehm ane bako, fere tob nehm elbo.

¹⁴ Timoti, soro asi, wo jo lim nsol nyi a ma kpili, fere taame tv, eji a kp'kahne nne no tib-a no.

¹⁵ A bomo nwer Esowo akahne ngare nyi a jolo ntiil tete sik anv. Nwer nyio bahk-a ma ka elkahne ni a bahke kahne mbang nyi eltahre.* Eltahre nio li go abo nya Kraist Jisos.

¹⁶ Alum Esowo kpee lohng goji Esowo,† eji l'lim nnoobo ka ane. Alum Esowo kpo tib etingitingi, fere jo nyam ane, jo soongo bo, fere jo rehke bo re bo jol go etingitingi,

¹⁷ eji nne Esowo l'jol nob nob, fere jo mal ellimi eltum anehng anehng ni nno.

4

Ana Pol jo rehke Timoti

¹ Erehke ji n kp-a kake a, n kp-a kake go esamahr bi Esowo, a bi Jisos Kraist, ye ji bahke lame aneb mbir mbir, a ba ma kpo. Tib go elbake ene ni á bahke bake ba ji go ege a nji etul, owo wahng n kp-a tongo re,

‡ **3:11 3:11** Elt 13:50; 14:5,19 § **3:12 3:12** Elt 14:22 * **3:15 3:15**
Jon 5:39 † **3:16 3:16** 2 Pit 1:19-21

² wo jo bung alum Esowo, k'jo be ndon, afi jolo ngare anyi.* Jo lennge abiafem tong bo, wo fere jo nyam bo, fere jo rehke bo. Lim nsol nyia kpee go mbang nyi a kp'tibi na bo, a elkpuumu.

³ Tibre ngare kp'bake nyi ane l'k'kpe jo kor bo re bo jo wuungu atung go etingitingi eltibi. Bo bahke jo toono ana ji bo bahke jo tir go bo a ntim. Bo bahke jo lim elbo, eji bo bahke jo seb at'tibi ba bahke jo tib bo nsol nyi bahke jo yebe bo go atung.

⁴ Bo bahke sennge etingitingi njahm, fere jo wuungu atung go aka nya li ana amongo.†

⁵ Wo, jo kunu elna ekpu go ejum ajehng ajehng! Jo kpuumu erem, wo fere jo lim eltum ni alum Esowo abungu. Jo lim eltum ena nseenga nseenge!

⁶ Tibre afung nya m bahke tahme njini nyia sa ebbiingi. Bo ma-m rod kp'yaange wohng go ana alahb njom ma Esowo, ma bo kpo yaange wohng go.‡

⁷ Me n nok ebta ebame go mbang nyi nno. Me n gohro be abahl enyame. Me m bel ekakesehk go eltoono mbang nyi Esowo.

⁸ Anv, ekpasi eltuuru jia, nong-m go es'song, ekpasi jio ji eno ji Esowo bi li nnooba nlamalam bahk-m tuuru efung bio. Me ntahngtahng sang á bahk-m tuuru. Á bahke tob tuuru nne awohng awohng no elbake ni á bahke bake kp-e koro.§

Alum nya Pol gohro bung

⁹ Lim, wo gulu elbake ga egame.

* 4:2 4:2 Elt 20:20,31 † 4:4 4:4 2 Tes 2:11 ‡ 4:6 4:6 Fil 2:17

§ 4:8 4:8 1 Pit 5:4; Jems 1:12; Ell 2:10

¹⁰ Tibre Demas, njini nyia m-e kehme elkoru.*
 Á ma-m tahm sa, tahm eje go Tesalonaika.
 Kresens ebtahm go Galesa. Taitus ebtahm go
 Dalmesa.

¹¹ Luk ntahngtahng wo ma sa a name. Ko Mak,
 wo ba a ne, tibre á bahk-m ma kak ebo go eltum.†

¹² Me n tum Tikikus tv go Efesus.‡

¹³ A l'kehm bake, soro ko ekpawobo ejame ji n
 tahme sa go etahk nsoo Karpus go Troas, ba ka-
 m. Tob ko awer enyame ba a nya, asehngesehng
 awer nya n kpo nyon nsol.

¹⁴ Aleksanda ntahletahl lim-m egburu ebi
 sehng.§ Esowo bahk-e bongo jang jang ana á limi
 no.

¹⁵ Wofono antahng, jo kun-e ekpu, tibre á
 tohkem t'taame tv alum enyahre nya e jo bung.

¹⁶ Go egame elam, eji n gbo mbang tooro nnyo
 elam emame, nnene jolem no yiim-m njahm. Bo
 kpee yaam-m sa.* Nong, Esowo lub tahm ka bo.

¹⁷ Esowo bi yiim-m njahm, fere ka-m eko, eji
 etib ebame l'yiimi, ane baka baka ba ki nyi Esowo
 l'wuk. Ano wo wahngé á tahr-m no yehke go nnyo
 mi egabe.†

¹⁸ Esowo bahk-m tahre yehke go nfem anyehng
 anyehng, fere kp-m tahm a name go ejahbetul eje.
 Nong, ellub jol a ne go njinanjini. Emen.

Nnyo mi Pol gohro kak

* **4:10 4:10** Kol 4:14 † **4:11 4:11** Elt 15:37; Kol 4:10 ‡ **4:12 4:12**
 Elt 20:4; Ef 6:21; Kol 4:7 § **4:14 4:14** 1 Tim 1:20 * **4:16 4:16** 2
 Tim 1:15 † **4:17 4:17** Elt 23:11; 27:23-24

¹⁹ Kak Priska abola Akwila nnyo,[‡] wo fere kak Onesiforus nnyo, a aneb etahk ebe.

²⁰ Erastus sa go Korint.[§] Trofimus, n tahm-e sa go Miletus, á kp'yame.*

²¹ Lim, wo ba ga egame, elkoko kehm rehngé. Yubulus, Pudens, Lenus, a Klodia, bo kpee tong-m re me n kak-a nnyo. Abon Esowo bako go tob tong-m re me n kak-a nnyo.

²² Nong, Esowo jol a etohko eja. Nnoobo nyi Esowo jol a na. Emen.

[‡] **4:19 4:19** Elt 18:2; Rom 16:3
4:20 Elt 20:4; 21:29

[§] **4:20 4:20** Elt 19:22

^{*} **4:20**

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4